

Asasakka Kommune Kajallermi innuttaaqatikka

Ukiortaami uummammik pisumik Kommune Kujalleq sinnerlugu pilluaritsi, ukioq 2009 tamatsinnut pisoqarfioqisoq assigiinngitsunillu misigisaqarfiusimasoq maanna naavoq, ukiumut qaanngiuttumut uummammittaaq pisumik Kommune Kujallermi qinikkat sinnerlugit suleqataalluarlusilu innuttaaqataalluarsimanissinnut qutsaviginiarpassi, neriutigaaralu ukioq nutaaq iserfigisarput tamatsinnut iluanaarnermik kiisalu pilluarnermik atugaqarfiujumaartoq.

Ukiut kingulliit marluk annertuumik piareersarfigereersimallugit maanna kujataani kommunit pingasuusimalluta ataasiulersimalerpugut, Kommune Kujallermik taaguuteqalerluta. Ukioq 2009, kattunnitta siunertaa tassalu innuttaasut ataasiullutik assigiimmillu pineqarlutik sullinneqarnissaat aallartippoq. Neriutigaaralu Kommunit sisamangortugut Kattuffippat KANUKOKA peqatigalugu suleqatigiilluarluta innutaasunik nutaamik iluatsilluartumik sullissisinnaajumaartugut.

Ukioq qaangiuttoq siuliani oqareernittut inuttut assigiinngitsutigut atugaqarfiusimavoq, ilatsinnut ajoraluartumik alianartunik assigiinngitsunik aqquasaagaqarfiusimaluni, ajutoornerit ilaqutariinnut inunnulluuniit ataasiakkaanut annertuumik atugarliortitsisimasut, qanigisanit toqukkut qimagaasimanerit annernartut inunnut ataasiakkaanut ilaqutariinnullumi inuunermik annertuumik allannguisimasut, kiisalu ukioq qaangiutilersoq inunnut ataasiakkaanut nappaamik ilungersunartumik eqqorneqarnermik nalaataqarfiusimavoq ilaqutariinni inuunermik annertuumik atukkatigut allannguuteqarfiusimasumik.

Piffissami matumani inuit tamakku aqquasaarsimasaannik innuttaasugut tamatta misigeqatigalugit eqqarsaatigaavut. Neriutigaaralu ullut nalliuttut piffissami kingullermi atukkavut tamanit pilluarnartumik atorneqarsimassasut kiisalu inunnut tamanut timikkut tarnikkullu nukittorsarfiulluarsimassasut, inuuneq ukiumi nutaami atugassarput tamatsinnut oqinneroqqullugu.

Ukioq qaangiuttoq, Kommune Kujallermi qinikkanit kiisalu Kommunemi sulisunit suleqatigiiffiilluarsimavoq, tamannalu qujassuteqaateqarfigissavarattaq, isumaga malillugu Komunalbestyrelse ataatsimoortoq aalajangigassanut pingaarutilinnut ataasiulluni amerlanertigut aalajangertarsimavoq, isumaga malillugu tamanut iluaqutaasusaaq anguniarlugu. Ukiarmi ukiumoortumik ukiup 2010-ip missingersuutissai suliarineqarmata tamanna takuneqarsinnaavoq, tassani Kommunalborgbestyrelse ataatsimoorluni missingersuutinik akuersivoq, missingersuutit akuerineqartut aningaasaliisutissatigut killeqaraluaqisut neriutigaarput Kommune Kujallermi ineriartoqqinnissamut aqutissiusinnaasasut, tassami sanaartugassat eqqarsaatigalugit Kommune Kujallermi sanaasanut Kommunep nammineq aningaasaleeqataafigisinnaasai 8.millioniinarnik aningaasartallit naammassineqarmata. Tassani pissutaanerpaat ilagaat Namminersorlutik Oqartussat Kommuninut aningaasaliisutigisartagaat 36.millioninit sipaarfigineqarmata Kommunie Kujallermut annertuumik malunnaatilimmik, tassami Kommune Kujallermut 6- millionit missaani tamanna naleqarsimavoq missingersuusiami malunnaateqarluartumik.

Siuliani sipaarniarfigineqarnerit taakkartukkat aallaavigalugit Ukioq nutaaq iserfigisarput maanna ukiuussaaq Kommune Kujallermi napaniarfittut atugassaq ingerlatsinerlu eqqarsaatigalugu sipaarniarfiusussaq neriutigaaralu tamanna pittsaanerpaamik anigorsinnaasagipput innuttaasunut sullissinermi malunnarpallaangitsumik.

Oqaatiginngitsoorsinnaangilaralu Kommunit kattutiinartugut Namminersorlutik Oqartussanit Naalackersuisunillu Kommunit taamak malunnartigisumik sipaarfigineqarnerat assut ajuusaarutigigakku, tassami kattunnerup kingunerisaanik suli aningaasartutikillisaanerit malunnarsinngitsut akerlianilli aningaasartuuteqarfiunerusut atorigut tusaaniarneqannginnatta, neriutigaaralu Naalackersuisunik Kommunit suleqateqarnerat tamassuminnga innarlerneqassanngitsoq ilami pisariaqarmat suleqatigiinnissaq.

Siuliani taakkartukkattut ukioq iserfigiligarput ataasiulluta ingerlalerluta atulertussaavarput, ukiullu tulliuuttut annertuumik Kommunimi qinikkanut atorfilittanullu ulapaarfiusussaapput assigiinngitsutigut piumasaqateqarfiusussat, neriutigaaralu tamanna ukiup tulliuuttut aggersut ingerlanerani innuttaasut sullinneqarnerannut malunnaateqarpallaassanngitsoq, taamaassanngippallu innuttaasusi naammagittalaarnissassinnik qinnuigissavassi, taamatummi pisoqassappat ukiup tulliuuttup ingerlanerani kisimi tamanna pissasoq neriutigaara, isumagalugu malillugu suli uani imaannaanngitsumi tamatta akisussaaqataallutalu suleqatigiittariaqarpugut kattunnerup pissusissamisut ingerlanissaa qulakkeerumallugu, ilisimassavarpullu tamatta naatsorsuutigissagatsigu arlaatigulluuniit pilliuteqarnissarput aqqusaartariaqassagatsigu, tamannami sumiluunniit pinngitsoorneqarsinnaanngivippoq annertuumik allanngortiterinermi.

Ukiut tulliuuttut ingerlanissaanni Kommune Kujalliup ineriartorluarluni ingerlaqqinnissaa maanna Kommunalbestyrelsusugut suleqatigiilluarluta qulakkeerluarniartussaavarput, tassanilu qinikkatut suleqatigiilluarnissaaq minnerunngitsumillu inuussutissarsiortunik suleqateqarluarnissaaq akisussaassuseqarluartumik ingerlanneqartariaqarpoq, kikkut tamarmik naammagisimaagaannik angusaqarfiussappat.

Inuussutissarsiorterlu Kommune Kujallermi ineriartussappat makku taassallugit saneqqukkuminaapput!

Aatsitassarsiorneq suliffippassuarnik nutaanik pilersitsisussaaq eqqunneqartariaqarpoq, suliffissatigit aningaasarsiornitsigullu sunniutissai pitsaasut eqqarsaatigalugit, Naalackersuisullu tassani piaartumik aalajangertariaqarput nunatta inuussutissarsiornikkut ineriartornissaanut alloriarnerit nutaat malunnaateqarluartussat utaqqiteqqissinnaangillat, tamakkumi aamma Kommunit ineriartoqqinnissaanut pisariaqarluinnassammata. Tassanilu pingaarluinnassaaq innuttaasut sukumiisumik piareersarluugaasunillu pineqartup ineriartortinneqarneranut malinnaatinneqartariaqarput.

Aalisartut piniartullu ineriartornissaminnut aamma periarfissarsiuussivigineqartariaqarput periarfissat nutaat ujartorlugit, tassani aalisartut piniartullu suleqatigiiffii qanimut suleqatigalugit inerisaanerit ingerlattariaqarput, alloriarnerillu nutaat kingullit Namminersorlutik Oqartussat Naalackersuisullu peqatigalugit ingerlanneqartut

Nunaqarfiit tunisassiorfeeraanit aaqqissuuseqqinnernik imallit ingerlateqqittariaqarput taamaasilluta nunatta iluani tunisassianik nioqquteqarnerit ingerlatilerlugit EU-p maleruagassai atunngikkaluarlugit

Savaatillit aamma suli periarfissarsiuunneqarnerat ingerlaqqittariaqarpoq, neqitigut naatitatigullu pilersuinerat annertuseqqullugu, tassanilu Kommunep, Inuulip kiisalu Neqi A/S-ip suleqatigiilersimanerat atorluarlugu inuussutissalerinermut ineriartorneq ingerlanneqartariaqarpoq aaqqissuulluakkamik.

Takornariaqarnerup ineriartortinnissaani inerisaavik suleqatigilluinnarlugu kujataani takornariaqarneq pilersarusiorneqartariaqarpoq nunaqarfigut ilanngullugit. Tassanilu Kujataani takornariaqarsinnaasut annertusarneqartariaqarput kujataanilu tamarmi angallannikkut pissuttsit tassa silaannakkut kiisalu imaatigut piaartumik ataavartunik iluarsiifigalugit.

Angallanneq eqqarsaatigalugu taasallugu pisariaqarpoq Narsarsuup ukioq kaajallallugu nunarsuup sinneranut attaveqaateqarfittut ingerlaanarnissaa kujataamiusugut sorsuutigiuartariaqarattsigu ikioqatigiilluta, ilisimavarpummi inuussutissarsionnikkut ineriartorneq Kommune Kujallermi ingerlaqqissappat tamanna pisariaqartoq.

Tassani aamma ilaalluinnarpoq nunatta kujaterpiaani imaatigut angallanneq ataavartumik isumannaatsumillu ingerlanneqaqqittariaqalersoq ataatsimoorluta piumasarisariaqarattsigu, ukiunimi kingullerni ajoraluartumik tamassuma pigineqannginneratigut nunaqqatinnguagut arlaqaqisut alianartumik ajunaarnerannik kinguneqartarsimavoq maanna unittariaqalersumik.

Meeqqat inuusuttullu soqutiginarfik peqqinnartunillu sammisassaqaarnissaat pisariaqarmat inuiaqatigiilluta ikioqatigiilluta akisussaaqatigiillutalu sammisassanik tamakuninga pilersitsiniartariaqarpugut inuit piunassutsiminnik sulisut qanimut suleqatigalugit tapersorsorluarlugillu.

Timersortarfiit, arsartarfiit tamakkulu assigisaat illoqarfigisatsinni pigisagut ullutsinnut naleqqussarlugit ineriartorteqqittariaqarpavut ullutsinnut naleqqussarlugit ineriarsarlugit, Qaqortumilu timersortarfiup nutarterneqarnissaanut pilersaarutip suliarineqaarsimasup periarfissariuteqqinnissaa ingerlateqqittariaqalerparput. Illoqarfinni arsartarfigut aamma ivigaasanik qallerneqarsinnaanissaat pilersarusiorlugulu periarfissarsiuuneqalertariaqarput atorluarneqarnerulernissaat taamaasilluta qulakkiisagattsigu.

Meeqqammi inuusuttuaqqallu sutigut tamatigoortunik Kommune Kujallermi tamarmi sunngiffimmini sammisassatigut periarfissagissaarnissaat qulakkeerneqarpat aserorterinerit ajortumillu ineriartorerit unikaallatsinneqarnissaat qularnanngimmat.

Pinaveersaartitsinertaaq tassani periarfigissaarnerusoq pilersinneqassaaq sutigut tamatigut iluaqutaasoq. Tassani pingaartitaraarputtaa pinaveersaartitsinerup aangaajarniutinut assigisaanullu kisimi tunnganani aammattaaq imminortarnermut tunngasumik ingerlanneqarnissaa tassami ajoraluartumik ukiuni kingullerni inuusuttunnguit arlaqaqisut Kommune Kujallermi immorlutik toqukkut qimagussimapput qanoq

iliuseqarfigineqartariaqartumik siunertalimmik. Tassani Kommune Kujallermi pina-veersaartitsinermut sulisugut anguniagaqarfiusumik pilersaarusiortariaqarput atorfilittat qinikkallu suleqatigiifigisassaanik kinguneqarluartumik angusaqarfiussappat.

Inunnik sullissineq suli pittsaanerpaafissaminut inissivinngilaq, tamannalu anguniartariaqarpoq qinikkat atorfilittallu qanimut suleqatigiisinnerisigut pilersaarusiullu siunertallit pilersinnerisigut, minnerunngitsumillu isumaginninnerup iluani sulisunik tapersersuilluarluni suleqateqarluarnikkut.

Atuarfiup manna iluarsartuuneqartup pittsaasumik atuarfittsialaap anersaava malillugu ineriartorteqqinnissaa nutarterineq malillugu ingerlanneqartariaqarpoq pilersaarusiortuarneqarlunilu meeqqat pittsaasumik angusaqarsimallutik atuarfimmit ingerlaqqittarnissaat qulakkeerniarlugu. Ilinniartitsisut piumassuseqarluartut pigineqartariaqarput ilinniartitaanerallu pilersaarusiortuarneqarpoq pikkorissarnerilu meeqqat atuarnerinut sapinngisamik akornusiingitsumik ingerlanneqarlutik.

Kommune Kujallermi inuttaaqatikka, suleqatigiilluarluta ataqatigiilluarluta akisussaqaqatigiilluta Kommune Kujalleq sapinngisamik imminit napatikkiartuaartoq periarfissaminik atorluaafiulluortoq ineriartorluartorlu pilersikkiartortigu, Sapinngilagut!

Taamatut oqaaseqarlunga ukiortaami pilluaqqoqippassi ukiumillu iluanaarfiullunilu pilluarnartumik kissaallusi.